

<><><><><><>

3rd Phase Campaign End

जम्मू-कश्मीर च त्रीये ते अखीरले गेड़ दे असैम्बली चुनाएं लेई प्रचार कल संझां मुक्की गोआ। आकाशवाणी दे जम्मू संवाददाता मुजब, इस गेड़ तैहत प्रदेश दिएं 40 असैम्बली सीटें लेई कल यानि पैहली अक्टूबर गी वोट पुआए जाने न। इनें 40एं सीटें चा, 24 जम्मू संभाग दिआं ते 16 सीटां उत्तरी कश्मीर दिआं न। जम्मू च जित्थे कांग्रेस ते बीजेपी बश्कार सख्त मुकाबले दिक्खने गी मिली सकदा ऐ उत्थे गै घाटी च कांग्रेस ते नेशनल कांफ्रेंस दे इंडी गठबंधन गी पीपुल्स कांफ्रेंस, पीडीपी ते अवामी इतिहाद पार्टी थमां चुनौती थहोई सकदी ऐ। इस गेड़ तैहत जेड़े प्रमुख मेदवारें दे सियासी भविक्ख दा फैसला होग उंदे च छम्ब थमां कांग्रेस दे मेदवार ते साबका उपमुखमंत्री तारा चंद, आर.एस. पुरा थमां चुनां मैदान च उतरे दे प्रदेश कांग्रेस दे कार्यकारी प्रधान रमण भल्ला, जम्मू नार्थ सीट लेई मैदान च खड़ोते दे साबका मंत्री ते बीजेपी दे मेदवार शाम लाल शर्मा ते इस्सै सीट परा चुनां लड़ै करदे नेशनल कांफ्रेंस दे मेदवार अजय सडोत्रा शामल न। इंदे अलावा बसोहली थमां कांग्रेस पार्टी दे मेदवार चौधरी लाल सिंह हुंदा मुकाबला बीजेपी दे दर्शन सिंह हुंदे कन्नै होग। पेंथर्स पार्टी दे नेता ते साबका मंत्री हर्ष देव सिंह हुंदा मुकाबला उधमपुर दी चनैनी सीट लेई अपने पराने साथी ते हुन बीजेपी दे मेदवार बने दे बलवंत सिंह मनकोटिया कन्नै होग। ध्यानजोग ऐ जे 2014 च बीजेपी नै जम्मू संभाग दिएं 37 सीटें चा 25 सीटां जितियां हिआं जिसलै के जम्मू जिले च बीजेपी गी 11 चा 9वें सीटें पर जित हासल होई ही।

<><><><><><>

3rd Phase Voting

प्रदेश च कल 7एं जिलें दिएं 40एं असैम्बली सीटें लेई होने आहले त्रीये गेइ दे चुनां लेई 39 लक्ख 18 जहार शा मते मतदाता वोट पाने दे अपने हक्के दा इस्तेमाल करडन। आकाशवाणी दे जम्मू संवाददाता मुजब, इस गेइ लेई 415 मेदवार चुनांस मैदान च न। चुनां आयोग नै 7एं जिलें - जम्मू, कठुआ, सांबा, उधमपुर, बांडीपोरा, बारामूला ते कुपवाड़ा च 5 जहार 60 मतदान केन्द्र बनाए दे न ते 20 जहार शा मते चुनां कर्मिं गी इयूटी पर तैनात कीता गेआ ऐ। कुल 39 लक्ख 18 जहार 220 मतदाताएं चा 20 लक्ख 9 जहार 33 मर्द, 19 लक्ख 40 जहार 92 महिलां ते 57 थर्ड जेंडर मतदाता न। इंदे च 18एं शा 19एं बरें दी उम्मी दे 1 लक्ख 94 जहार नौजवान मतदाता, 35 जहार 860 दिव्यांग मतदाता ते 32 जहार 953 ऐसे मतदाता न जिंदी बरेस 85एं बरें शा मती ऐ। मतदान बड्डलै 7 बजे थमां संझां 6 बजे तगर होग। हर इक मतदान केन्द्रै पर सब्बै लोइचदी सुविधां जकीनी बनाइयां जाडन। ऐसे 50 मतदान केन्द्र होडन जिंदा प्रबंधन महिलाएं आसेआ कीता जाहग। ईआं गै 43 मतदान केन्द्रें दा प्रबंधन दिव्यांग लोकें ते 40 मतदान केन्द्रें दा प्रबंधन नौजवानें आसेआ कीता जाहग। चुनां आयोग नै 45 ग्रीन पोलिंग स्टेशन ते 33 अनोखे पोलिंग स्टेशन बी बनाए दे न। एहदे अलावा 29 मतदान केन्द्र कब्जा रेखा यां अंतर्राष्ट्री बन्ने दे नेडे बी बनाए गे न। कश्मीरी मतदाताएं लेई 24 विशेष मतदान केन्द्र बनाए गे न जिंदे चा 19 जम्मू, 4 दिल्ली ते 1 उधमपुर जिले च ऐ।

<><><><><><>

CEO-Suspension

प्रदेश च चुनां प्रचार ते होरनें सरबंधत सियासी गतिविधिं च सरकारी मलाजमें दी शमूलियत दा संज्ञान लैंदे होई जम्मू कश्मीर दे चुनां दफतरै 23 मलाजमें गी मुअतल करने दे कन्नो कन्नी आदर्श अचार संहिता दी खलाफवर्जी लेई ठेके ते एडहाक पर लाए गेदे 6 मलाजमें गी कम्मै शा हटाई दिता ऐ। एहदे इलावा ऐसे 20 मुलाजमें गी उंदे पराने दफतरें शा हटाइयै होरने तैहसीलें ते जिले दे दफतरें च लाया गेआ ऐ, जिंदे खलाफ फर्काफर्की आला रौंस अख्तिवार करने दियां शकैता सामने आइयां हियां। जारी

असंबली चुनाएं दरान चुनां दफतरै प्रदेश च बक्ख-बक्ख अजेंसिएं दे राएं कुल 130 करोड़ रपे जब्त कीते न। एहदे च पुलस मैहकमे नै सब्बने शा मते 107 करोड़ 50 लक्ख रपे केन्द्री जीएसटी आस्सेआ 9 करोड़ 88 लक्ख शा, राज्य जीएसटी आस्सेआ 8 करोड़ 3 लक्ख रपे, एनसीबी आस्सेआ 2 करोड़ 6 लक्ख रपे, औंदन टैक्स मैहकमे आस्सेआ 87 लक्ख रपे ते स्टेट एक्साईज डिपार्टमेंट आस्सेआ 50 लक्ख रपे जब्त कीते गे न। तोआई बक्ख-बक्ख सियासी पार्टिएं गी चुनां दफतरै आस्सेआ बक्ख-बक्ख चुनावी कम्मैं ताई तकरीबन 7 जहार 88 इजाजतां दित्तिआं गेइयां। अजें तगर सामने आए दे आदर्श आचार संहिता दी उल्लंघना दे 1 जहार 263 मामलें चा 600 पर कारवाई करिये उनेंगी उंदे अंजाम तगर पुजाई दिता गेदा ऐ जिसलै के 364 पर अजें जांच चलै करदी ऐ। 115 मेदवारें, सियासी पार्टिएं ते मीडिया घरानें गी आदर्श आचार संहिता दी उल्लंघना दे आरोप च नोटिस जारी कीते गे न। नशीले पद्धार्थें, नगदी ते शराब गी गैर कनूनी तरीके कन्नै लैने आलें खलाफ सख्त कारवाई करदे होई सरबंधत अजेंसिएं अजें तगर 32 एफआईआर दर्ज कीतियां न।

<><><><><><>

Jamaica PM-India Visit

जमैका दे प्रधानमंत्री डॉ. एंड्रयू होलनेस भारत दी च'ऊं दिनें दी जातरा पर अज्ज बड्डलै नमीं दिल्ली पुज्जी गे। केंद्री वित्त राज्य मंत्री पंकज चौधरी होरें ब्हाई अड्डे पर उंदी अगवानी कीती। डॉ. होलनेस हुंदी एह पैहली भारत यात्रा ऐ ते जमैका दे कुसै प्रधानमंत्री हुंदा एह पैहला दपक्खी दौरा ऐ। भारत दी यात्रा दे दरान डॉ. होलनेस होर कल प्रधानमंत्री नरेन्द्र मोदी हुंदे कन्नै शिष्टमंडल स्तरै दी गल्लबात करडन ते राष्ट्रपति द्रौपदी मुर्मु ते उपराष्ट्रपति जगदीप धनखड़ हुंदे कन्नै बी मलाटी करडन। ओह् केई होर गणमान्य व्यक्तियें ते बपार ते उद्योग जगत दे प्रमुखें कन्नै बी गल्लबात करडन। उंदी इस यात्रा दे दरान केई समझौता जापनें पर दस्तख्त कीते जाने दी मेद ऐ जेहदे'नै भारत ते जमैका बश्कार दपक्खी सरबंध होर मजबूत होडन।

<><><><><><>

JK New DGP

वरिष्ठ आईपीएस अधिकारी नलिन प्रभात होर कल्लै थमां जम्मू-कश्मीर में नमें पुलस महानिदेशक दा कार्यभार सांभी लैडन। गृह मंत्रालय नै 15 अगस्त 2024 गी उनें'गी जम्मू-कश्मीर पुलस दा विशेष महानिदेशक नियुक्त कीता हा। ओह आर.आर. स्वैन हुंदी थाह एह औहद्धा सांभडन जेहड़े अज्ज रटैर होआ करदे न। प्रभात होर नेय समें पर डीजीपी दा औहद्धा सांभा करदे न जिसलै आतंकवाद इक बड्डी चुनौती पेश करै करदा ऐ। ओह एहदे शा पैहले दक्खनी कश्मीर आपरेशन्स रेंज दे डीआईजी ते सीआरपीएफ दे श्रीनगर सैक्टर च बी अपनियां सेवां देई चुके दे न। एहदे अलावा ओह सीआरपीएफ दे कश्मीर आपरेशन्स सैक्टर च बतौर इंस्पैक्टर जनरल बी तैनात रेई चुके दे न।

<><><><><><>

